

碩儒各信所習是非紛錯準裁靡定故有父子異同  
之論石渠分爭之說廢興由於好惡盛衰繼之辯訥  
斯蓋非通方之至理誠君子之所歎息也左氏豔而  
富其失也巫穀梁清而婉其失也短公羊辯而裁其  
失也俗若能富而不巫清而不短裁而不俗則深於  
其道者也故君子之於春秋沒身而已矣升平之末  
歲次大梁先君北蕃迴軫頓駕于吳乃帥門生故吏  
我兄弟子姪研講六籍次及三傳左氏則有服杜之  
注公羊則有何嚴之訓釋穀梁傳者雖近十家皆膚  
淺末學不經師匠辭理典據既無可觀又引左氏公  
羊以解此傳文義違反斯害也已於是乃商略名例  
敷陳疑滯博示諸儒同異之說昊天不弔大山其頽  
匍匐墓次死亡無日日月逾邁跂及視息乃與二三  
學士及諸子弟各記所識并言其意業未及終嚴霜  
夏墜從弟彫落二子泯沒天寶喪予何痛如之今撰  
諸子之言各記其姓名名曰春秋穀梁傳集解